

Kua rogo pea koutou ki te manaaki nui a Te Atua kua tukua e ia ki etahi o nga wahi o te ao.

Tera tetahi wahi kei te pito hauauru o Ingarani ko Wales te ihoa, nuku atu i te ono tekau mano nga tangata o tenei whenua kua whakatahuritia ki Te Atua. Ko taua iwi i mua he iwi e ngakau nui ana ki nga mahi takaro o te ao ki etahi atu mahi rere ke, kahore rawa o ratou whakaaro nui ki Te Atua, inaianei ko te mahi nui ko te inoi tonu ki Te Atua, kikii tonu nga whare karakia i te tangata. Kua tae mai etahi mea pera ki era atu wahi o te ao.

Ki taku whakaaro he hiahia tonu to Te Atua, kia tukua mai e ia taua tu manaaki ki te Hahi Maori o tenei takiwa. I pehea te timatanga o tenei taonga nui ki a ratou? Na te inoi a tetahi tangata Karaitiana, kia tae kaha mai te Wairua Tapu ki roto ki tona ngakau, i muri iho ki te iwi nui katoa. Kei te pohehe tatou ma Te Atua e homai he anahera, he aha ranei hei whakaara i te huanga e moe ana. Te huarahi mai o ta Te Atua manaaki ki te tangata, ma te tangata ano te mahi. E kore pea e tae mai tenei ki a tatou, he kore whakapono, he kore hiahia ki te inoi.

He pai kia mahara tonu tatou ki a tatou, he noikore, kia whakawhirinaki ai ki a Te Karaiti hei kaha mo tatou, e kaha ai hoki te tipu o te Hahi i tenei wahi o to tatou Pihopatanga, e ki ana hoki ta Te Karaiti kupu, "Ko ahau tena hei hoa mo koutou a te mutuanga ra ano o te ao." He wahi nei tatou no te tinana o Te Karaiti, kia whai kaha tatou i roto i te Ariki, i te mana ano hoki o Tona kaha.

Tenei ano tetahi kupu aku kia tatou, ko tetahi mate nui o tenei Atirikonatanga ko te kore whare karakia o nga kaiinga karakia. Ko te tino tohu o te ora o te whakapono o nga tangata, ko te tahuri nui tonu ki te hanga whare karakia. E hoa ma kia kaha tonu tatou

Tetahi kupu whakamutuanga aku kia tatou koia tenei:—Kaua e wareware ki nga mea e pai ai te noho o te tangata. Kaua e whakakorea te